



säubverständlech

Text: Hans Jürg Zingg

Melodie: Hans Jürg Zingg

Begleitimprovisation: Edwin Peter

säubverständlech versteit är sy frou
säubverständlech versteit si ihn ou
säubverständlech isch aus bi däm paar
beschtens ir ornig u voukome klar

säubverständlech macht är nid was si
ornig mues sy süsch wo chiente mer hi
är tuet vrdiene si macht mit de ching
si tuet bediene un är isch dr king

klar dass zum ässen u das isch sys rächt
är mit me luun chunnt wo meischtens isch schlächt
klar dass es ghört zu dr gattinnepflicht
z tröschte mit scharm u mit schmackhafte gricht

säubverständlech sy si etabliert
hei sech mit sich u dr wäut arangschiert
und so spiut jedes schlächt und rächt
syni rouen aus heer und aus chnächt

klar dass är zwöimau ir wuchen im bett
tuet was är mues o wenn si nid grad wett
klar dass är öppe mau uswärts verchehrt
klar dass für si sech so öppis nid ghört

säubverständlech hei si zwöi ching
drü wär scho zviu de gieng mängs nümme so ring
säubverständlech nimmt si d piue
s schysst se zwar a doch dr heer het sy wiue

säubverständlech seit är ihre ‚schatz‘
si seit ihm ‚butz‘ oder ‚mutz‘ oder ‚spatz‘
i dene wörter isch mumifiziert
d liebi wo si einisch zäme het gfüert

säubverständlech läbt men im fride
fingt me heigs egetlech gwüss no so zfride
was aber egetlech da dranne ligt
dass me vrbissen en yschbärg umschwygt

au haub jahr gits einisch es gwitter
de wird gchotzet u zwar gauebitter
säubverständlech scheidet me nie
sisch geng scho zspät oder grad no chly zfrüe

säubverständlech giut so nen eh
hüttigstags aus eher passé
säubverständlech heisst das no nit
dass es se tatsächlech niene me git

säubverständlechkeit isch dr tod
vo jeder eh syg si schwarz oder rot
gägen ihri eskalazion
hiuft numen eis: IMPROVISATION!

auti liebi roschtet
nid geng wi scho geng
nümm lang wi scho lang

beweglech blybe choschtet
nid gäut aber muet
u zyt u geduud u närve

öppis probiere heisst
öppis risgiere

mesdames et messieurs faites vos jeux
mais ne vous livrez pas au hasard
agissez vous-même
car il s’agit de vous-même
et votre vie c’est votre vie

u we’s vrby isch
isch’s vrby